



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma : f Tir Yimyim

Instagram tiryimyim@aolima



tir yimyim

TAPAK 7



International Tennis Hall of Fame atema Leander Paes nominate süogo

Imran Khan tanga tepuokdaki anirogo



VOL. XX NO. 347 (ADOK 347) DIMAPUR YANGTEPNÜ (THURSDAY) RONGJUI (SEPTEMBER) 28, 2023 ₹ 5.00

Police-i nisung 16 apu: DGP Rupin Sharma NDPS Act kübok Nagaland Police 43 mapa nungi anentsü



Rupin Sharma, IPS (file)

Kohima, September 27, 2023 (TYO): Nagaland Police-i synthetic drugs & psychotropic substances aser IMFL dak sendakba nung nisung 16 apu aser FIR 14 benokogo.

“Ozüng alema mapa inyakba noktangtsü atema garitem aser hotel, restaurant mita aoer” ta Director General of Police (DGP) Nagaland, Rupin Sharma-i Police Headquarters, Kohima nung osangbener den jembidang ashi.

September 1 nungi 15 tashi nung Nagaland Police-i Spasmo Proxyvon aser tang süngjang 1369, Brown Sugar, Heroin gram 163.6 aser IMFL 446 puogo ta pai ashi.

“Nübertemi Narcotics, Drugs, IMFL ayokba metetra na anasa aliba Police Station mesüra Narcotic Police Station nem osang sangoktsütsü mepishir” ta DGP Sharma-isa ashi.

‘Call Your Cop’ mobile App nung Nagaland Police Officers & Police Stations indang Closed User Group phone numbers lir aser osang sangoktsür maitsü miimbanga ayutsü, ta paisa

Nagaland aser Arunachal nung AFSPA atsülanger

New Delhi, September 27, 2023 (Agencies): Ministry of Home Affairs (MHA)-i Nagaland aser Arunachal Pradesh kübok tesem kar nung ita 6 atema Armed Forces Special Powers Act (AFSPA) atsülangba osang metetdaksüogo.

Iba Act ajanga “disturbed areas” nung mapa lemzüka aliba armed forces aser Central Armed Police Forces nem tashi talila agütsür.

Arunachal Pradesh nung Tirap, Changlang aser Longding district tem den Namsai, Mahadevpur aser Chowkham tesemtem nung AFSPA alitsü.

AFSPA, 1958 nung Section 3 kübok item tesemtem ‘disturbed areas’ ta sangoktsür aser October 1 nungi tenzüka ita trok tashi atsülangtsü.

Nagaland nunga district 8 aser tanga district pungu kübok police stations 21 nung AFSPA atsülanger.

Nagaland nung AFSPA atsülangba district 8 ji Dimapur, Niuland, Chumoukedima, Mon,

metetdaksü.

Nagaland police jawans nem agütsüba tsüngsem indang video atema jembidang “item khuret atema inyakyim ka tenzüko. Tsüngsem supply balala aru aser August ita lema agütsü aser tawa agütsüba tsüngsemtem tajung dang liasü” ta Rupin Sharma-ashi.

“Ajisüaka onoki video nguogo aser tsüngsem amala raksaba osettem mapang talangka yura mejungi akümer. Onoki iba atema bushisüngdang südar” ta paisa shisem.

Mon district nung gari lendong ka nung driver aser handyman asüba atema paisa ashiba agi “post-mortem agiogo aser iba nung taitüsü aketba onük mesüra miimbanga ayutsü kecha mali” ta DGP Rupin Sharma-ashi.

Tena ya tepsetba masü mesüra tasa ka atonga inyakba masü anungji Nagaland aser Assam nung alirtemi osang tai meprokshitsü mepishir, ta paisa shisem.

Nagaland Police 43 mapa nungi anentsüogo

Nagaland Police 43 tashi Narcotic Drugs and Psychotropic Substances (NDPS) Act kübok mapa nungi anenja lir.

Parnok 43 nungi 23 nem NDPS Act kübok temerenshi agütsüogo, ta DGP Rupin-ashi.

Mapa nungi anenja aliba police 20 atema departmental inquiry ka agidar, ta paisa shisem.

Kiphire, Noklak, Phek aser Peren lir.

Maneni Kohima, Mokokchung, Longleng, Wokha aser Zunheboto kübok police stations 21 nung AFSPA atsülangtsü.

Külen, Manipur state sorkari Bodbarnü police stations 19 dak alaka tanüngba tesem ajak ‘Disturbed Area’ ta sangdongogo.

Police station 19 ji Imphal, Lamphel, City, Singjamei, Sekmai, Lamsang, Patsoi, Wangoi, Porompat, Heingang, Lamlai, Irilbung, Leimakhong, Thoubal, Bishnupur, Nambol, Moirang, Kakching aser Jiribam lir.

Manipur nung telungpur telok balalai tashiyim mapa inyakba ajanga Armed Forces-i civil administration den yariteptsüsa akümer, ta Manipur Governor-ashi.

State sorkari tensa asadanga sülen police station 19 dak alaka tanüngba tesem ajanga “Disturbed Area” ta sangoktsüogo.

Nagaland nung World Tourism Day mongogo



Kohima, September 27, 2023 (TYO): Nagaland nung Bodbarnü World Tourism Day mongogo aser iba mapang state nung tourism renloka aotsü atema alima wazüka ayuba mapa nung nübertemi shilem agütsü indang nenshia jembioogo.

Tourism Department-i Tseminyu district nung “Tourism & Green Investment” omen nung ajemdaker sentong tongtiba ayonga agiogo.

“Küm 60 tejakdang Nagaland-i state angu aser literacy rate 80% tongogo saka alima ainba den industrialization ajanga Naga nungeri arem shiruru aser süngdonglidong samatsüogo” ta Tourism Minister Temjen Imna Along-i ashi.

“Naga nungeri green investment nungdaker kechiyong asen state nung arem-min tulu ka lir saka shiruru mali, ayongtem lir saka ango mali aser nisungtemi pei

ajangzüksü atema süngdong maneni atsünger” ta pai ashi.

“Nagaland nung dang masü saka tangalena kasa dang lir aser künü anogo asenoki tzu tajemtsü aser arem atema rara tenzüksü kechiyong modernization aser industrialization maparen nung asenoki itemji amadoker” ta Minister Along-isa ashi.

“Kohima district kübok Khonoma yimtsüngi arem shiruru wazüka Asia nung greenest village akümba atema tenüngsang agütsür. Asenoki Khonoma model sülen anidaksüla aser nübertemi shiruru aser süngdonglidongtem wazüka ayutsüla aser tourism circuits renloktsüla” ta paisa ayongzük.

“Tourism ya meimchir takütem, lokti aser linük ajanga melenshitetba industry ka lir. Iba ajanga rongsenketzung renloker aser sobaliba lemsateper” ta Tseminyu MLA Jwenga Seb-ia

ashi.

Nagaland nung sobaliba senmang takar moaja lir, alima tobur tajung aser nisungtem kanga sasapela lir. Anungji asen state ya tourist temi kanga sapuba tesem ka akümtsü lenmang sadema lir saka asenoki tourism renloktsüla, ta pai ashi.

“Nagaland-i kümshia tourist 1,30,000 shi arur aser iba nungi foreign tourists 2000-5000 dena lir” ta Tourism Secretary Nchumbemo Lotha-ia ashi.

Tourism Department-i State Tourism Policy yanglushidar aser iba ya National Tourism Policy nung lateta aliba ama asütsü saka Nagaland den putepa yanglutsü, ta Nchumbemo-isa ashi.

Iba sentong nung Ministry of Tourism ajanga tenzüka Travel for Life Pledge agitep. Iba ya Swadesh Darshan 2.0 scheme kübok tourist tesemtem renloka aotsü atema lir.

Nagaland nung Sep 30 nü lokti nübodoka merükmejutsü

Kohima, September 27, 2023 (DIPR): Centre sorkari Swachhata Pakhwada - Swachhata Hi Seva (SHS) 2023 nung shilemka ama linük ajungalen merükmejuba mapa inyaktsü ayongzükogo, ta Home Department, Government of Nagaland-i sangdong ka nung ashi.

Mahatma Gandhi nem tetushi agüja linük ajungalen merükmeju mapa inyaktsü aser Prime Minister-

i anir tongtipang nisungtemi swachhata maparen nung shilem agütsü.

Nagaland state-ia linük den külemi iba merükmejuba sentong nung shilem agütsü aser ibaji September 30, 2023 anepdang 10:00 ako nung agütsü. October 1, 2023 Deobar asüba agi Nagaland nung Honibarnü iba mapa inyaktsü ta Home Department-i metetdaksü.

District ajak nung Deputy

Commissioner tem nodal officers ama shimogo aser parnoki urban areas nung ULB Administrators, rural areas nung BDOs aser departments/agencies nungi district ketdangstürtem den yaritepa iba mapa inyaktsü, ta Home Department-isa ashi.

State Level nung Commissioner, Nagaland-i nodal officer ka ama inyaktsü ta parnokisa ashi.

Assam kübok Sonari ajanga mesenzütsü metetdaksür Mon District Administration-i gari lendong atalokba osang jangjashitsür

Dimapur, September 27, 2023 (TYO): Mon district kübok Angjanyang sub-division nung gari lendong ka atalokba sülen Assam kübok Charaideo district nung tensa mejungi akümba ajanga Nagaland sorkari senzüsensongdang kümdangtsü osang metetdaksüogo.

Nagaland sorkari tensa mesüngjem tashi Mon district nungi Assam kübok Sonari tsünda mesenzüi ali tajungba ta metetdaksüogo.

“Lendongtsüdong nungi kümzüka alitsü atema Public Transport aser tanga garitem Mon district nungi Assam kübok Sonari, Charaideo ajanga Assam/Dimapur len mesenzüi atatsü metetdaksür” ta Mon Deputy Commissioner office-i sangdong

ka nung ashi.

“Maneni Sonari, Charaideo ajanga senzüsüpurtemi tensa mesüngjem tashi tanga lenmangtem ajanga senzüsü metetdaksür” ta parnokisa ashi.

Külen, SDO(C) (HQ) & Nodal Officer, Media Cell Rongsenmenla, NCS-i tanga sangdong ka nung Angjanyang sub division nung Assam nungi gari ka tsükokba osang jangjashitsüogo.

September 25, 2023 nü Aboi Police Station nung Tata Yodha (Registration No. AS 33C 0941) kiburi gari samaba ken o ka benok. Iba osang angashiba sülen Officer-in-Charge-i anir gari bushitepa mapa tenzüka ta Rongsenmenla-i ashi.

Police-i bushitepa aodang

Angjanyang aser Longching tsüngdang gari tsükoka aliba angu. Gariji lenküpokken feet 200 shi lur tsükoka liasü aser tasügang ana liasü.

Police-i tasügang anaji District hospital, Mon nung bener oa postmortem agi aser September 26, 2023 nü kinunger ket nung mangji agütsü, ta SDO(C) (HQ)-isa sangdong nung shia lir.

“September 25, 2023 nü Mon district kübok Angjanyang sub division nung atalokbaji gari lendong dang liasü aser tanga tatalokba kecha mali anungji nübertemi iba dak sendakba osang tai meprokshitsü mepishir” ta Mon District Administration-i metetdaksüogo.

Kohima nung State Level Clean Election seminar aka



Kohima nung State Level Clean Election seminar akadang tangokba noksa angur.

Kohima, Rongjui/Sept. 27 (TYO): SVEEP sentong nung shilem ka ama Office of the Chief Electoral Officer, Nagaland ajanga September 26, 2023 nü De Oriental Grand, Kohima nung Clean Election indang State Level seminar ka ayongzüka liasü, kong Nagaland nung aliba arogo balala nungi arua shilem agia liasü.

Tang NBCC ajanga tenzüka aliba Clean Election Movement tajungtiba nung mapa kuma amshitsü aser iba sentong tejakleni anir aotsü asoshi shisa lemsateptsü asoshi sapang ka agütsü nükjiong nung iba seminar ya agüja liasü.

Ruokuovituo Khezhe, CEO (Officiating), Nagaland ajanga iba sentong tenzüka jembidang electoral roll shidak aser mürekteta amshitsü tongtipang ta ashi, koba vote agütsür ka jangjatsür. Electoral roll nung tenüng zülüoktsü aser election yimya shidak nung aser tajungtiba nung agitsü atema awareness agütsü asoshi Election Commission of India ajanga tenzüka sentongtem rongnung SVEEP ya ka lir ta pai ashi.

Iba seminar ajanga 'one man one vote' tangatetba nung clean election dak sendakba nung tajangzük alitsü aser ibaji ajanga temsüa aliba voter temi tetsübo tarendak kecha makai vote agütsü imlar, ta pai ashi.

Rev. Dr. Zehou Keyho, General Secretary, Nagaland Baptist Church Council ajanga iba sentong nung jembidang, vote

agütsüba ya nisung ka temeden amshiba democratic yimya ka aser koba temeshi lir, saka vote agütsütsü temeden ya asenoki meshidaki amshir, ta ashi.

Vote agütsütsü temeden ya sempet ka lir, saka nisung karbo iba sempet amshitsü memelar aser kari züngshia mali, kechiaser parnoki tezü danga bilemra aser kari meshidaki amshira kari pei ajangzüktsü asoshi amshir, ta pai ashi.

Iba dak sendakba nung arogoi khuret abenba indang pai lemsatept aser state elections nung yimya tamajung amshiba ya Naga nunger kija, kibong, yimtsüng, arogo, kin, sobaliba aser sorkar tentet tashinung kongshia lir, ta ashi.

Meimchir shisatsü tajung tamendak dak samatsüba tashi tulutibaji ibai lir aser iba yagi asen tarutsü putu jenjang raksatsür, anungji Clean Election movement ya ajak meyong lir, ta Rev. Dr. Zehou Keyho-i ashi.

Khristanpur asoshi Clean Election movement ya tanüla tongpang ka ama maneni raratsü aser Nagaland nung ajaki agizükttetsüsa democratic yimya nung election agitsü tamangertem khuret lir, ta pai ashi.

Iba seminar nung tetushi tesemdanger T. Mhabemo Yanthan, IAS, Commissioner Nagaland liasü aser pai ashiba agi, election mapang asen Khristan tanüla samar, asen tangatetba aser yimya tajungtem samar.

Koda masüba tensa mapang nokdaksü imla aliba rejutemi takok ngua menodakteter. Nüburtem junga alitsü asoshi iba amala reju temi ochishia inyaksüji kanga tongtipang lir.

Iba ama tongtipang rejutem meshimeshia wazüka alitsü nungdaker. Lenmang ana dang lir, aser aji teimla makai alitsü aser maneni system raksar aliba agizüktsü mesüra tasü ita nokdaka ajaki agizükttetsüsa system yangertüsü.

Iba sentong nung menden aser onir ya Sharon Longchari, Joint CEO, Nagaland liasü aser Rev. Kedo Peseyie, City Church Kohima ajanga sentong tenzüka sarasadem.

Iba seminar nung technical session tem liasü aser yangji shisalen sayur ya CEO indang office aser arogo tsütsülen nungi liasü.

Shisalen sayur ya Awa Lorin, Joint CEO (Topic- Legal Provisions on Electoral Roll and Conduct of Elections); Toshimeren Aier, Assistant CEO (Topic- Reflections on State Assembly Election, 2023); Dr. Villo Naleo, Convenor, Clean Election Movement, NBCC (Topic- Clean Election as a platform for ushering desirable change) aser Dr. Pangernungba Kichu, Professor of Society, Christian Ethics and Contextual Theology, Oriental Theological Seminary, Chumoukedima (Topic- Clean Election Movement Challenges and tasks ahead) nungertem liasü.

Longkhum yimtak tanü Longkhum Tourism Website lapok



Longkhum yimtak tanü Longkhum Tourism Website lapoker kelen Late Dr.I.Longrizung Trust pur Longkhum yimden yimsüsür, Longkhum Tourism Committee pur külemi tangokba noksa.

Longkhum, Rongjui/September 27(TYO): Longkhum yimtak tanü Longkhum Tourism Website "www explore longkhum.com" Senior Tourism Officer, Mokochung Wt.Imtisenla Pongener-i la aruagi sentong nung medentet nung vitually dang lapoktsüogo.

Longkhum Tourism Website "www explore longkhum.com" ya Longkhum nunger asür Dr.Longrizung tenung nung par chinur aser semchisemnurtemi tentetba Late Dr.I.Longrizung Trust ajanga teyari aguja tenzüksür.

Tanü iba sentong nung Late Dr.I.Longrizung Trust tenung nung Asür Longrizung jabaso Wb.L.Alemtemsü Ao-i mapang tatsüka agia jembidang iba Tourism Website lapokba ajanga Longkhum yimnubur kisüng masü

saka nübur jenti ajangzüktsü, aji asünung Longkhum Tourism Policy tekaraba nung yanglur mapa kuma inyaksangshi asütsülatata ashi.

Longkhum nung iba Tourism Website lopkba sülen yimtsüng kari danga iba mesükba website lapoknera Late Dr.I.Longrizung Trust ajanga takokba lenmang ajak nung yariteptsüta paisa metetdaksü.

Longkhum Tourism website takok ngua inyaka aotsü asoshi Late Dr.I.Longrizung Trust -i tourism maparen inyaksangshiyim tesayuba sentong ayongzüka agütsütsü,tanabuba nung Longkhum nung tourism mapatong achayanga inyaksü asoshi Computer ka den printer agütsütsü aser tasembuba nung nisung ka nem kum pungo(5) asoshi itasen agütsütsüta Late

Dr.I.Longrizung Trust tenung nung Wb.L.Alemtemsü Ao-i metetdaksü.

Sentong nungsa Longkhum Village Council,Chairman Wb.C.Angang-i tarur pela agizüka jemi aser Longkhum Tourism Website indang teratet iba website achayanga yanglusang Er.Atoba A.Longkumer-i ashi aser Longkhum Tourism Committee tenung nung Wb.Rongpang Longchari iba website lapokteta asoshi Late Dr.I.Longrizung Trust dang tepelaba metetdakja jemi.

Iba sentong Dr.Zülu Sor Pastor NCRC ajanga sarasadem tenzüka asernWb.Tsüngtaloba Imchen lenisüba nung sentong achayanga agiba den Tsüngrem nem tenungsang aguja Longkhum Baptist Arogo Youth Pastor Wb.Toshimongbai sarasademertembang.

Dy.CM-i Id-E-Milad benjong salem abener

Dimapur, Rongjui/Sept. 27 (TYO): Deputy Chief Minister, Y. Patton-i sangdong ka nung Muslim nungertem den Id-E-Milad benjong salem lemsatep, koba Prophet Muhammad asoba anogomung bilemtetba benjong ka lir.

Asenoki Prophet Muhammad teti bilemtettsüla aser ochi lenmang nung asenok

jajatsüla aser alima ajunga nung yimjung tesunep asoshi inyaksüla, ta pai ashi.

Iba anogomung nung state BJP legislator tem tenüng nung tepela Id salem abener aser iba benjongmung ajanga külem adianurtemtsünga yimjung aser temeim tali adoktsü sarasadema atar, ta Dy. CM, Y. Patton-isa sangdong nung ashi.

Dimapur nungi National Integration Tour tenzüko



Dimapur, Rongjui/Sept. 27 (TYO): GOC, Spear Corps, Lt Gen HS Sahi, AVSM, YSM, SM ajanga Bodhbarnü Headquarters 3 Corps, Rangapahar Military Station, Dimapur nung National Integration Tour tenzüko liasü, koba Indian Army ajanga ayongzükba alitsü.

Iba sentong tenzüko mapang Lt. Gen. Sahi-i ashiba agi, linük indang sobaliba senmang tajung nükjiong nung iba tour ya ayongzükba lir.

Pai Nagaland nung lanurtem

dang mapang melenba den külemi pei tangatetba melenshia tejakleni aotsü ayongzükba liasü.

Iba sentong nung Kohima district kübok Chakabama nungi tetsür 7 densema kaketsür 19 aser tesayur anati Bareilly, Ranikhet, Nainital, Dehradun aser New Delhi nung army institutions aser tongtipang tesemtem semdangtsü.

Iba tour ya anogo 14 atema lir aser iba mapang kaketsür temi India Tir, Eastern Army Commander aser dangartem ajurutsü.

10th Nagaland Spelling Bee Championship alitsü



Kohima, Rongjui/Sept. 27 (TYO): Fountain Club ajanga State Council of Educational Research & Training (SCERT) den lungjemer 10th Nagaland Spelling Bee Championship 2023 sentong October 5 & 6, 2023 anogotem ayongzüktsü, ta sangdong ka ajanga ashi.

Iba championship tenzüko sentong ya "The Learning Edge" omen nung ajemdaker RCEMPA, Jotsoma nung anepdang 9:00 ako nungi tenzüka agitsü aser taoba mapang dang nungi senpet sen timba alitsü, ta Fountain Club chairman Ruokuovilie Chale aser organizing committee convenor Vipopal Kintso nati Bodhbarnü osangbener senden ka Hotel Japfü nung amendang ashi.

Takok angurtem nem kulizung kakat aser trophies den senpet champion nem sen 80,000, runners-up nem sen 60,000, tasembuba jenjang tongteter nem sen 40,000 aser pezübuba jenjang tongteter nem sen 20,000 agütsütsü.

Maneni quarter final atonger shia nem sen 10,000 agütsütsü aser 'young speller' nema sen 10,000 agütsütsü, ta ashi.

Iba championship nung

shilem agitsü asoshi form ya October 3, 2023 tashinung agütsütsüla.

Iba tetoktepba nung kakat reju shia nungi Class 6-9 tsünga speller ana-nai shilem agitettsü.

Ajisüaka government school tem nungi kanga ajema shilem agiba mechi iba championship ayonger temi government school ketdangsurtem dang kaketsür tasü aitsü mechi shilem agitsüpur yoktsü ayongzükba liasü.

Iba tetoktepba indang temzüng-ozüng den entry form ya www.fountainclub.in, www.morungexpress.com, www.excellogics.co.in. nungi download sütettsü.

Kasa ya ano SCERT aser DIET centre ajak (Chichama, Mokochung, Wokha, Pfutsero, Mon, Tuensang, Zunheboto aser Dimapur) nung angutsü.

Form tem ya fountainclubkma@gmail.com dangi mail sütettsü mesüra Super Travels, Hotel Japfü Kohima; Equipments and Sports near Razgü point, Kohima; NSTCB Ltd, High School junction branch Kohima nung yutsütettsü, ta ketdangsur temi ashi.

India nung teintet rogo aika kanga sensak tia nung lir: UN

New Delhi, Rongjui/September 23 (Agencies): India linük nung kanga tain/teintet rogo shilem 40 dak temabo kanga sensak tia nung lir aser iba nungjagi shilem 18.7 bo sen tarulen lenmang kecha makai alir, ta UN report ka ajanga metetdaksü.

Kanga teintet rogotem sensak tia nung aliba ajanga parnok taküm libaliro jenjang aser temang anema alibaren kongshitsü, ta UNFPA indang India Ageing Report 2023 ajanga metetdaksü.

"India nung teintet rogotem shilem pongusü nungi shilem asemsü (2/5) bo kanga sensak tia nung lir-Jammu & Kashmir nung shilem 4.2 lir, Punjab nung shilem 5, Lakshadweep nung shilem 40.2 aser Chhattisgarh nung shilem 47 lir," ta report nung shia lir.

Kanga teintet rogotem mapa, pension aser income jenjang asadanga ajanga parnok shilem 18.7 bo income kecha mali, ta bushiteta liasü.

Kasa report ajanga, India nung teintet tetsürtem arrshi talangba alitsü, ta bushitet; linük aika nung ibaji kasa dang lir.

UN report ajanga, "India nung tang arrshi kum 60 alir nisung kaji ano kum 18.3 tashi

alitsü akok, aser iba nungjagi tetsürtem arrshi talangba- ano kum 19 tashi (79) alitsü akok. Iba denji medemdangra teburtem ano arrshi kum 17.5 (77.5) dang alitsü akok," ta metetdaksü.

Himachal Pradesh aser Kerala na nungbo arrshi kum 60 tetsürtem ano arrshi kum 23 (HP) aser 22 (Kerala nung) alitsü akok. Item state nung tang arrshi kum 60 alir teburtem dang nungi tetsürtemji kum 4 agi talangba arrshia alitsü akok. National average nungbo tetsürtemji tebur dang nungi kum 1.5 agi dang talangba alitsü," ta report nung shia lir.

"Sensak tiaji talisa kanga teintet akumba mapang nung ataloker, kechiyong kanga teintet tetsürtem amitsür akümer, kija alir aser sen tarulen lenmang maliba den kiojen kanga ajema kumadoker. Parnoki taküm alitsü atema kibong teyari nungdaker," ta report nung shia lir.

1991 kum nungi tenzuka India nung kanga teintet rogotem indang sex ratio (tebur 1,000 shia nung tetsür kwiar medemdangba) tanem-tanemi teimba kumdar, ajisüaka nütsung ajak sasep nungbo sex ratio ji tang tashi kasa dang lir, ta kasa report ajanga metetdaksü.

Priyanka Gandhi-i UP kübok Phulpur menden nungi tokteptsüa akok

New Delhi, September 27 (Agencies): Congress Geneal Secretary, Priyanka Gandhi Vadra-i sangküm Lok Sabha election nung Uttar Pradesh state kübok Phulpur constituency nungi tokteptsüa akok, ta osang ka ajanga metetdaksü.

Phoolpur ya Gandhi kibong junga amenoka aliba tesem ka lir. Iba menden nung taoba mapang Ato kilonser Jawaharlal Nehru-i 1952, 1957 aser 1962 kumtem elections nung takok ngua liasü.

Uttar Pradesh nung party tashi ita aliba constituency asem rongnung iba menden densema lir; tanungba menden anaji Rae

Bareli aser Amethi na lir.

Ano tanga osang ka ajanga ashiba agi, Madhya Pradesh assembly elections nung takok angutsü atema Congress-i Priyanka nem Madhya Pradesh kübok Jabalpur menden nungi toktepdaksütsü akok.

Tamalen osang ka ajanga, taoba elections ana nung Ato kilonser Modi-i anaben tashi takok anguba Varanasi Lok Sabha menden atema Priyanka Gandhi toktepdaksütsü, ta metetdakja liasü.

Iba mapang nungji Uttar Pradesh state unit Congress Tir, Ajay Rai-ia, Priyanka-i Varanasi nungi tokteptsüa akok, ta metetdakja liasü.



September 27, 2023 nü New Delhi nung All India Management Association (AIMA) indang 50buba National Management Convention nung ISRO (Indian Space Research Organization) Chairman, S. Somnath-i 'Commanding New Heights: India's Space Odyssey' onük jembidang tangokba noksa nung angur.



September 27, 2023 nü Ahmedabad nung 'Vibrant Gujarat Global Summit' kum 20 ajungba nungtem nung ayongzükba sentong agitsü jakdang Ato kilonser, Narendra Modi-i Science City nung Robotics Gallery semdangba noksa nung angur.

TN sorkari kum 2 tsungda nisung 50,000 mapa nung anioktsü: CM Stalin

Chennai, Rongjui/September 27 (Agencies): Taruba kum ana tsungda Tamil Nadu state sorkari nisung 50,000 shi sorkar mapa balala nung anioktsü, ta Bodhbarnü sentong ka nung Tamil Nadu Chief Minister, M K Stalin-i metetdaksü.

Chennai nung Group-4 kübok mapa nung tang tasen shimba nisungtem nem appointment orders agütsüba sentong nung jembidang Stalin-i, mapa nung tang shimokertemi nüburtem atema ochishia inyaksüla, kechiyong pei mapa ajanga tenung tajung mesüra tenung tamajung angutsü, ta ashi.

Kum ana tejaklen, May 7, 2021 nung DMK-i sorkar kümba sülen tang tashi nung sorkari nisung 12,576 nem sorkar mapa agütsüogo aser Bodhbarnüa nisung 10,205 mapa nung anioker.

Taküm kum kija nung Tamil Nadu sorkari ano nisung 17,000 nem sorkar mapa agütsütsü.

Taruba kum ana tsungda state sorkari nisung 50,000 shi mapa balala nung anioktsü, ta pai metetdaksü.

TN Public Service Commission-i ketdangsüa tatidang balala ajanga lanur 10,205 mapa nung shimokogo; item mapa rongnung Junior Assistant, Village Administrative Officer, Typist aser Stenographer densema lir.

Chief Minister-i nisung 12 nem appointment orders agütsü

aser maneni mapa nung 10,205 dang shimteta liasü. shimoka aliba nisung 10,000 dak tema nem appointment orders agütsütsü.

Item mapa atema nisung lakh 22-i TNPSC Group-4 exam agütsü aser iba nungjagi nisung

Stalin-isa, sorkari nisung shinga mebendangi ajak nem sorkar scheme balala ajanga teyari agütsütsü; iba sorkari loktiliba nung ajak kasa zungshir, ta ashi.



NHPC Limited
(A Government of India Enterprise)
Regd. Office: NHPC Office Complex, Sector-33, Faridabad-121003 (Haryana)
CIN No.-L40101HR1975GOI032564

NHPC den tayongzükba balala ajangshitsü atema adentsü jaoker...

NHPC-I CONTRACT BASIS NUNG "CONSULTANT (SECURITY)" ATEMA RETIRED OFFICIAL NUNGDAKER

Advertisement No. NH/Rectt./02/2023



NHPC ya premier Schedule-A, 'Mini Ratna' Company ka lir aser shilem 70.95% bo India sorkar meyong lir; iba company ya India nung hydropower company tulutiba lir aser hydropower plants design, construction aser operation nung lenir lir. Tang tashi nung NHPC-i Hydro Project 22 commission asüba den Wind Power Project ka aser Solar Power Project ana 7097.20 MW capacity nung install süogo, iba nungji senteper inyakba projects densema lir.

NHPC-i Indian Armed Forces/Central Armed Police Forces/Central Police Organisation/State Police nungi mapa nung anisungzükker alir Official, Director General mesüra iba den kasa jenjang nung kum ka atema contract basis nung "Consultant (Security)" post asoshi nungdaker, aser Headquarter ji Faridabad nung lir.

Osang tejangja aser online registration atema yimlibilema NHPC website www.nhpcindia.com nung 'Careers' section reprangang.

Online registration tenzükba : 04/10/2023 (anungdang 11:00 ako)

Submission atema tatembangbuba : 18/10/2023 (anungdang 11:55 ako)

Website: <http://www.nhpcindia.com/career.htm>. application ji online ajanga dang agizüktsü.

www.nhpcindia.com @nhpcindia @NHPCIndiaLimited nhpcindia @nhpcindia NHPC Limited

ALL INDIA INSTITUTE OF MEDICAL SCIENCES
ANSARI NAGAR, NEW DELHI – 110 608
Admission Notice 213/2023

DM/M.Ch & MD (Hosp. Administration) Courses January-2024 Session
Admission asoshi INI-SS Entrance Test

All India Institute of Medical Science, New Delhi-i (DM/M.Ch (3 year) MD (Hospital Administration) AIIMS New Delhi aser shilem agir tanga AIIMS, PGIMER, NIMHANS, JIPMER aser SCTIMST January-2024 Session atema Admission asoshi Entrance Exam atema jaoker, osang tejangja yamai.

Online Registration for application			
Courses	Institutions	Opens on	Closes on
DM/M.Ch.(3 year) & MD (Hospital Administration)	AIIMS - New Delhi & other New AIIMS, PGIMER- Chandigarh, NIMHANS- Bengaluru, JIPMER- Puducherry and SCTIMST-Thiruvananthpuram	27.09.2023	11.10.2023 at 5:00 PM

Tongtibang: Prospectus aser osang tejangja atema yimlibilema website www.aiimsexams.ac.in nung reprangang. Tenung agütsür ajaki mapang shia iba website reprangtsüla, kechiyong temelenshi/osang tali/updates ajak iba website nung dang upload asütsü.

Sd/-
ASSISTANT CONTROLLER (EXAMS)

CBC 17112/12/0022/2324



TIR YIMYIM YIMOBILEM (EDITORIAL)

DIMAPUR YANGTEPNÜ, RONGJUI (SEPTEMBER) 28, 2023

Amongnü yimkong nübo adoktsü !

Alima nung linük kar nungbo nübortem asoshi tamangba yimsü ya yimten temzüng agi amangdaksür saka asenok tia ajung, India nungbo tamangba yimsü tsütsübo iba amaji yimten talenba kecha mali, senso purtem rongnung shibai kechi yimsü amangnudir amangtsü akokba dang masü saka nisung kari kecha tamangba yimsü daka mamangnüra ajia pa mesüra la mulung, kechisüdirsäka tamangba yimsü kabosa amangtsüla ta masü. Iba jagiang, tamangba yimsü tsütsü India nung kecha tarendak aser tetsübu melii küm aika aruogo. Ajisüaka, tanü asüng India nung tamangba yimsü tsütsü nübortem mulung yiruteptsüsa kija aser lokti tenteti inyakbatembo toktsür government-i dena inyaker. Item rongnung tangcenter government-i October 01 nü Khristan-tem asoshiibo temeshi amongnü yimkong nübodoka pei alidak tesemtem merüka amungtsü asoshi yimyim agütsüba ya ka asütsü. Iba yimyim ya center government nung yimsüsürtemi Khristan-tem asoshi amongnü yabo mapa meinyaki meshiteta amungba anogo ta meteter metetsümonga sangdongba yimten telemtetba ka asünungbo Khristan-tem reshikangshitsü atongba sentong ka asütsü aser memeteti ka lemtet asünungbo India koba dang Bharat ta ajar, iba linük indangji junga memetet aser mejangja ser yimsü asürtemi lemtet asütsü. India ya kin ka dang masü alima ka, iba lima nung shi achir aser machir ajak lir. Ano, shi achirtem rongnunga kari nashi shi machir aser karibo ak shi machir ta tamangba yimsü agi tebang memedemdaksür. Aji oda, tekülem mung aser tekülemba yimya dang masü saka achi ajem, kiba-kiyim aser sobaliba yimyatem aika tamangba yimsü agi bendangdaksür. Atangji, tamangba yimsü agi sobaliba balala kümdaktsüba telok balala rongnung, tatishitsü agi, shi achir o machir na külemi alitsübaji tasak, kechiyong shi achirtemji shi machirtem atema tesempatsüka lir. Ajisüaka, India nung aliba kin kidong aser nübortem yabo joko libadoker, anungji kati ka sobaliba aser tamangba yimsü akhümtsübutepa telongjem aser tangatetep nung alitsüba dak alaka tashiyim agi amangdaksütsü mesüra mamangdaksütsü merangra, iba jagi nübortem rongnung rongrongshishi aser meputepang tali adentsü. India nüchiso ngur küm 75 tashi shi achir o machir na, süngyanglu külemer o mekülemer na, amongnü külemer o rogonü külemer na aser tenla kidang külemi sentepa külemer o pei pei arua külemlü oli ta asür na külemi kin ka ser arutetba tashiji kati ka angatetba aser kati ka den aremzüktepba ajanga lir. Iba tashiji mangateti tanü amai yimteni amongnü kangtepa yimkong nübo adoktsü ozüngsa yimyim ayimra, atangji India ama temeyoktep aliba linük nungbo iba government aser item yimsüsürtemji mapettsü. Tebang agibo aika ashitsü akok, saka amongnü yimkong nübo adoktsü yimten yimyim ayimoktsüba government aser yimten telokji Khristan yimsü akhümtsübuba telok aser government-bo masütsü. Kena, India ya linük ka dang süaka, state aika agi longjemmer akümba linük asünungji, mapa aika nung center government-i shiaka, pei state dak apet sentong yanglua inyaksü atema linük temzüngi state nem tashi agüja lir. Iba tashiji amshia Nagaland government-i October ka amongnü melena September 30 küptoknü-ang yimkong nübudoka pei alidak tesemtem merüka amungtsü lemtetba telemtetba jagi, Nagaland nung alir Khristan-tem dak apet telemtetba agiba dang masü saka center government nem tangatetba tejangja ka agütsüogo ta bilemer. Atangji, Khristan-temiang temeim mapa inyaker, kaketshisatsü agütsür aser teküpbok tia nung aliba nübortem nüchi kümdakja aniteter, iba yimsüji anema inyakerter tebilemba aser tangatetbajibo tajungtäz masü. Iba jibo, tanela tekümtet indangjibo toktsür, alima libaliro aser sobaliba jenjang nung tangar shinga tajung mekümdaktsünüba jakla aser shisatsü asütsü. Iba amaisa yimsü asünungbo, ashiko, menua melii tarutsü nungbo amongnü ya mapa inyakba anogo kümtsütsüa akok. Ibai Nebukednezzar-i pa süngyanglu külemang ta Daniel nungertem nem ozüng agütsüba amai lir.

OLEMSABANG

TANISHIR TAJUNG KA

~ M.Meren EX. Pastor

(Yashi adok nungi...)

Israel ajunga madak chubatiba David shibai asüküma par temeranger aser nütsüngnüpur dak temolung lema asükümtsü tenzük aser pa meketa aliba kintem madoktsü pasasa temolung Alem aser nütsüng züngtang anungji Kibuba Tsüngremi kanga mepela aser Davider nütsüng anogo asem tsüngta nung nisung merijang 75 dak tali südaktsüba angur. Yamaji yimsüser majungba ajanga nütsüng nebor akoksadaksüba tejangja otsü nung angur.

Akidang tsürabur putu nung yim ka nungi ka küpzüka aoba aser yim tilala kema aoba item ajak ya meimtepa lia, jungtepa lia, kati ka taoba ta züngshia lia aoba ajanga masü saka yimsüsü majungba, nüpur mezüngshiba ta yamaji lia aoba ajanga pilaba timba angutsü.

Taoba putu nungbo Naga lima ajunga atema Impur nungtang telongjem mungdang ka liasü saka joko kin aika peisasa tenük rangdaka akumba ajanga aser peitsüng dak pei mang titeta akumba ajanga Lotha ama Sema ama aser Sangtem ama kenü ka kenü ka ta razüka ao, saka ibajibo tangatetep ajanga aser tepila o tajung jumbir temoatsü agüteper senshi saka Naga lima aika nung Mungdang ka tang aliba agi ana küma lemsaba angutsü. Mission field karbo ita aika office ajak shibanga yur kelen telok tuluka pakzüka or kelentang office lapokba angutsü. Item ajakji Mungdang nung lenir majungba ajanga atalokba angutsü.

Ano Naga lima nung Arogo ka agi ana akumba kar kar angutsü, aser ibaji Arogo olura anungji ana kümdi ta ser tangatetep agi ana akumba masü saka tashi agi rarateper pilaba timba angutsü aser item ajakji tenzük shisa tatsü, tangatetba tatsü aser tebilemdang maliba ajanga atalokba angutsü. America lima Boston yimti nung küm ishika jakdangbo Arogo kanga tulu aser tashi tait ka liasü saka pastor tamajung ka amshia ata aser pa ajanga Arogo kaji ana kuma pakdang aser tanü tashi anaprongla tashi mait kumer lir. Ajakji arogo nung amangbapurtem masü saka lenir majungba ajanga atalokba lir. Ano Arogo tulu aser yim tulu amala ajurua aodang Fellowship ana asem kumteta aor aser oda oda Fellowshipji Intependance kuma aotsüsa mapang agi bener arutsüdang kanga sashia rarateper dang pilaba aika angutsü aser ngua aruogo, item ajakji tenzük shisa tatsü aser tebilemdang peria maliba ajanga atalokba timba angutsü aser yamala maparen nung Mungdang tenzükerti tim lenmang sayuba ngua aruogo saka kenkenbo tatulen ayatsüsa mesüra rongsen akalen nokdaksüsa aser tebu akümtsüsa inyaktetra Arogo o Fellowship anaji Mungdang ajanga masü tashi tsükchir yanglutsütsü mapang ajurutsü item ajakji Mungdang leniri kanga shisa kaa meinyakra teraksaji Mungdang leniri inyaktettsü.

Ano tanü tensa nung yimtsüng aika nung yimden teraksa aser junga yimsü mesütetba angutsü item ajakji külem yimsüsürtem rong nung telongjem maliba, obang memetemba, sarutoker memeimba, pei yimtsüng memeimba ajanga atalokba angutsü aser menden loksar aser sarutoker o sarutokerna tsüngta tsükchi tendaktsür aser molumi ajangzksüsa inyaktetdaksür item ajakji lenir majungba ajanga ataloker. Tongtibangsa Election mapang balaka leniri sen talep ka yong yimtsüng yoka achir aser takar Contitateji Minister menden nung mendaktsür aser tashir, yimden meimer, alima yanglutsü tashi aketertem ajenzüka yutsür kechiyong paji sensaker aser yimsüsürtem malizükter anungji matoker aser joko Minister mendenji takar amenba mendentang akumer saka tatoker ajakibo yimden yimlibo junga bener moteter kechiaser North East State 7 rongnung Nagaland Stateji tamajungba aser sensaktiba ta jumbibaji nümatangtsübo masü. Yimsüsüba mapabo tajung, kanga junga yim asür sernung oda alimaji pasasa raksar aser pa sasa mainer ta shibai shitettsü, Hoi; Naga nung tashirtem, pei lima meimertem lirabang tenük rangdaker asen lima penzüdangang, Kong terenlok ali? Aser Naga lima koloni aor aser tanü asen Aortem Kong lir? Saka oda ashirtangashe tongtibangbaji ka süale ka süale ajak majung masüji lenir karitanga alima raksaba nung tena lira aser aibelena lira odia tai nangzüktsüla aser tatok meshitsüla, idangjitang alima suneptsü, David chubaibo pei tai aoyi ma nung mener Kibuba dang tatok meshi saka tanü alima nung shiba südir süaka jakdaka mapa tamajung inyakteter tai mekumnüba lima lir, anungji kechisa südir süaka tatok meshiba aser tai nangzüktepba mali tashi Nagalima tia ajaklen telongi lupet alutsü. Yihuda nungertem anogoshia tanem-tanemi lupet lur kodang ponglang atong idangji par chirnur aser semchirtemi mang yima jepa ashí, ozü tsüraburtemi tai mena aser tanü parnok menen khu onoki abener ta ajepba angutsü, memenue Naga kin iba tiajagi aitsü kanga tsüpua bilemetsürani.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir

Nigeria nung puer aoba Khristan putir, Marcellinus Okide chiokogo



Marcellinus Obioma Okide

September 27, 2023: September 17, 2023 nü Nigeria nung puer aoba Khristan putir, Marcellinus Obioma Okide puer oa liasü saka anogo ishika jakdang pa chiokadokogo, ta par Arogoi metetdaksü.

Pa puer aoertemi September 21 nü pa chiokadokogo, ta Catholic Broadcast Commission of Nigeria-i metetdaksü.

Enugu nung Arogoi sangdong ka ajanga, pa puer aoertemi pa meyrutsü chiokba atema onok pelar, ta metetdaksü.

Arogoi chancellor, Wilfred Chidi Agubuchie-i, "Ozü adianu aser putir, Marcellinus Obioma Okide chiokogo, ta onoki tepela nung sangdonger," ta metetdaksü.

"Putir Okide kümzükba atema Enugu nung Catholic Arogoi ajak takoksang

Tsüngrem dang pelar. Iba ama tensa ka nung nenoki sarasademtsüba atema ajak dang pelar," ta paisa metetdaksü.

September 17 nü putir Okide Arogoi aoba mapang nung telok kati pa puer ao. Pa den külemi aliba Khristan trok-a pua liasü.

Taküm January ita nung research organization- SB Morgen Intelligence indang report ajanga ashiba agi, yaküm Nigeria nung prangpong amer telok balalai Khristan putir 39 tepset aser putir 30 puer oa liasü.

2020 küm nungsa putir 145 anema inyakba tatalokbatem liasü.

Meimchir temeden atema inyakba melungtet telok Intersociety-i ashiba agi, September 16 aser September 17 anogotem nung putir den

tangar trok puer aoba den külemi Fulani teloki tatalokba asem nung ainlen senzür nisung 30 puer ao.

South Africa Catholic bishops' conference indang Denis Hurley Peace Institute nung Director, Johan Viljoen-i, "Enugu nung tensa kanga mejungi kümogo. Enugu state aser Benue state na arrtsüa lir aser Benue state nunga Khristantem anema inyakba tatalokba aika lir," ta metetdaksü.

"Security sepaitemi ochishia meinyaker, anungji parnoki nisung puer aoer telok den külemi inyaksema senotsü lemsateper asütsüa akok. Nigeria nungbo security sepaitem ya ozüng alema inyakba nokdangertem masü saka timtem agütsüba nung parnoka densema shilem agirtem lir," ta paisa ashi.

Reshikangshi ajangshiba Khristan aikati US nung mejenoker

September 27, 2023: Alima nung linük balala nung Khristantem reshikangshi ajanga US nung jenokba shilem 70 agi ajema kümogo, ta report ka ajanga metetdaksü.

Khristan charity telok, Open Doors indang "Closed Doors" report ajanga ashiba agi, 2022 küm reshikangshi ajangshiba Khristan 9,528 shii pei linük toktsür oa US nung jenok, saka 2016 küm nungbo reshikangshi ajanga US nung jenoker Khristan 32,248 liasü.

2016 küm Myanmar nungi Khristan refugees 7,600 US nung jenoka liasü saka 2022 küm nungbo Myanmar nungi US nung jenoker Khristan refugees 587 dang liasü.

Iran nungi 2016 küm Khristan refugees 2,000 dak tema US nung jenoka liasü saka 2022 küm nungbo Khristan refugees 112 dang US nung jenok.

Yamaji 2016 küm Eritrea nungi Khristan refugees 1,639 US nung jenoka liasü saka 2022 küm nungbo iba linük nungi Khristan refugees 252 dang US nung jenok.

"Atangji osangji, alima nung tesem tulubaka Khristantem kümzükba alitsü atema majung. Reshikangshi ajanga tekümzükba bushia jenokba tesemji US südaksütsü nungdak," ta Open Doors report ajanga metetdaksü.

Khristantem aikati reshikangshi ajanga pei linük toktsür US nung jenok saka tangbo US nung jenokertem kanga ajema kümogo; alima tesem ajaklen Khristantem reshikangshi kanga bulua kümogo, ta Open Doors CEO, Ryan Brown-i metetdaksü.

Taküm Open Doors-i sayaba World Watch List ajanga ashiba agi, tang alima nung reshikangshi ajangshir Khristan million 360 shi lir. Küm shia US Tiri linük nung

refugee tem kwi jenokdaksütsüar lateta ayur, aser iba sasep nung küm shia US nung refugees jenokdaksü.

2016 küm US nung refugee 97,000 US nung jenoka liasü saka 2018 küm nungbo refugees 23,000 dang US nung jenok aser coronavirus wara tenzükba mapang refugees 10,000 shi dang US nung jenoka liasü.

Open Doors-i ashiba agi, taküm US nung refugees 125,000 jenokdaksütsü lateta lir aser iba nungjagi tang tashi nung refugees 60,000 shi dang US nung jenokogo.

World Relief telok indang advocacy & policy tatong Tir, Matt Soerens-i, "Kuli balala ajanga pei linük toktsür ajener refugees indang record onok ket nung lir aser item kulitem rongnung yimsü nung ajemdaker reshikangshiba densema lir," ta metetdaksü.

ANOGO ABEN TSÜNGREM DEN

Penpuba talungtsü

Nai ne sasa ali nung rongsen terizüng, kong song agi achir aser aueri auyar...saka nai ne rongsen kotak nung rizügang. Mathi 6: 19-20.

Taküm ainlen jajaba nükjidong tetezü ratetba aser angatetba dang tali tanga tongtibangba mali. Aikati ali rongseni tepela agütsütsü ta bilemer. Tajinütsü talungtsü akaba aser tobur tajung ki akaba ajanga "taküm tajungji" akatsü ta parnoki bilemer.

Asenoki shisa langa bilemtsü Yisui ajungshir. Rongsenji ken atema dang, itemji song agi achir mesüra tangari bener oadoker ta Pai ashi. Tanü asenok takar asütsü akok saka asüngbo sensaker akümtsü akok. Ano Pauli iba nung bendenloka ashir "sen meimbaji tamajung tera ajak lir" (I Timoti 6: 10). Temenen lenmang nung rongsen bendentsü kanga temela. Asenoki alima ajangzükter tanela samara tajangzük kar ma? (Mathi 16: 26).

Asen taküm nung shitakba rongsen bendentsü meteta alitsüla. Rongsen dang nungi Tsüngrem aser tangar dang meimbaji temaba südaksütsüla. Asen Tsüngrem yimli aser Pa temeshiba tama bushira, tanüngbaji Pai bendenloksütsü. (Mathi 6: 33). Khristan taküm kaji telung nung tepela agi asünger aser ibaji aseni tema nung aliba agi madoksatsü. Yisu den jajaba jaji teti taküm daki anitsü.

CBCC-i October 1, Amongnü 'Cleanliness drive' nung shilem magitsü

September 27, 2023: Mahatma Gandhi nungtem nung October 1 nü ayongzükba 'cleanliness drive' nung shilem magitsü, kechiyong iba anogo ya Amongnü lir, ta Chakhesang Baptist Church Council (CBCC) aser Naga Students' Federation-i metetdaksü.

Parnoki shidi ka ajanga Nagaland Chief Minister, Neiphiu Rio dang iba anogo ya melenshitsu, ta mepishiyo.

Linük tebuti, Mahatma Gandhi sor küm 154 ajungba nungtem nung Ato kilonser, Narendra Modi leniba nung 'national cleanliness drive' ya ayongzük.

September 24 nü Ato kilonser Narendra Modi-i India nung ajak dang October 1 nü anepdang 10:00 ako nungi 11:00 ako tashi 'One Date, One Hour, Together' ta ajaba libajen merükba nung shilem agitsü ayongzükba liasü.

Clean-up drive ji parks, ayongküm, tourist aser public tesemtem nung agitsü aser item tesemji district administrations-i shimsü.

Nagaland Baptist Church Council (NBCC)-ia züngsem Arogotem dang iba anogomong ya Honibarnü mesüra Hombarnü amongtsü mepishia

metetdaksüo. NBCC, Chakhesang Baptist Church Council aser Naga Students' Federation-i Amongnü ya anisüngzükba anogo aser Khristantem tekülem agiba anogo lir, anungji iba anogo nung nübodoka libajen merükba sentong nungji shilem magitsü, ta metetdaksü.

Chakhesang Baptist Church Council-i, mapa inyaka amongtsü atema Amongnü anogo ka dang shimba ajanga sorkari yimsü anema inyakba sayur, ta metetdaksü.

CBCC-isa züngsemtem dang, linük nung Khristan tamang raksatsütsü atema maneni merangba anema iba anogomong nung shilem magitsü metetdaksü.

Naga Students' Federation-ia Khristantem dang Amongnü mapa meinyaktsü metetdaksüo.

Nütsüng million 2.2 aliba Nagaland state nung nütsüng shilem 87 bo Khristantem lir.

Alima nung nütsüng teimtiba aliba linük, India nung küm shia jana-ona ton million 65 adoker, aser 2030 küm tashi nungbo küm shia jana-ona ton million 165 ajungtsüa akok.

Tang tashi nungbo jana-ona shilem 20 shi dang 'process' asür.

AO OSHI ANGAZÜKDAK:

TANÜ ANGAZÜKTSÜBA OJANG

Sanen

(n) ki amendakba süng mesüra yin (beam)
* Ki yangludang süng temerang agi sanen yanglur amendaker.

Sanen

(n) lokti aniba telok, luden rongnung temaba (Executive)
* Lokti mapa takok ngua inyaktsubaji Sanen luden dak keta lir.



OLONG PAITEP # 6650

Grid for Olong Paitep # 6650 with numbers 1-17 indicating starting points for words.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Mepupet - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdokor - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6649 TELANGZÜBA


TIPIEN :

- 1. Tanga, 6. Wara, 7. Rajang,
9. Anük, 10. Jenjang,
11. Alar, 14. Ngashi, 15. Nala,
16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among,
12. Miim, 13. Anem.

Alima nung nütsünyongsük timtiba linük 10 yamai lir aser iba ya Jan 18, 2023 tashi nung asadangba :



Source: Internet World Stats - www.internetworldstats.com/stats8.htm
8,031,800,337 world population estimated for January 18, 2023
Copyright © 2023, Miniwatts Marketing Group

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Form for Tepela Tasoba Anogo with fields for Tenüng, Tasoba anogo, Küm, Class, School, Talidak, and Salem osang.



Manipur nung BJP Mandal office ka rongdoktsü



Manipur kübok Thoubal district nung nisung telok kati BJP mandal office rongdoktsüba noksa nung angur.

Thoubal, September 27, 2023 (Agencies): Manipur kübok Thoubal district nung nisung telok kati BJP mandal office rongdoktsü. Manipur nung kin o kin rara

adokba sülen BJP office rongdoktsüba ya tang tasen masü. Taküm June ita Thoubal district nungsa BJP office asem tashi nisungtemi raksaja liasü.

Bodbarnü nisung telok jagi office gate, windows raksatsü aser complex kima nung anena aliba SUV indang windshield raksatsü.

Manipur nung kaketshir ana tepsetba sülen Imphal Valley nung mepetmesü adoka lir.

Bodbarnü Imphal Valley nung kaketshirtemi tesem balala nung lungkak aitba sentongtem ayonga agiba ajanga tensa mejungi kümogo.

Assam-i Himachal nem Rs 10 crore flood relief aid agütsü

Guwahati, September 27, 2023 (Agencies): Assam-i Himachal Pradesh nem flood relief aid ama Rs 10 crore agütsüogo.

Assam Minister Chandra Mohan Patowary-i Himachal Pradesh Chief Minister Sukhvinder Singh Sukhu nem sen agütsü.

Himachal Pradesh nung tzünglu kanga aruba ajanga nisung taküm, kiojen aser

infrastructure aika akoksaba mapang ka nung Assam-i senotsü teyari agütsü.

Chief Minister Himanta Biswa Sarma-ia Himachal Pradesh nung tzümetsüng agi kongshia alirtem yaritsü osang metetdaksü.

"Assam nunga kümshia tzümetsüng ajanga timtem jenti ajurur. Assam sorkari teyari nüngdakba angateta lir

asera iba jagi Himachal Pradesh sorkari tenzüka "Aapda Rahat Kosh-2023" nem Rs 10 crore agütsütsü lemtet" ta CM Sarma-i ashi.

Iba sen ya Minister Chandra Mohan Patowary ajanga agütsütsü mapa lemezüksü aser pa Shimla tashi orr Assam nung tenüng nung Rs 10 crore agütsüogo.

Assam nung October 1 nungi Manas National Park lapoktsü

Guwahati, September 27, 2023 (Agencies): Assam nung October 1, 2023 nungi Manas National Park and Tiger Reserve 2023-2024 tourist season tenzüksü.

Tzüngluruwa aruba ajanga June 5, 2023 nungi Manas

National Park and Tiger Reserve shibanga liasü.

Manas National Park Field Director Rajen Choudhury-i September 26, 2023 nü sangdong ka ajanga park lapokba osang metetdaksü.

"Wildlife (Protection) Act,

1972 aser Assam Wildlife (Protection) Rules, 1997 nung lateta aliba ama tourist atema park lapoktsütsü" ta Choudhury-isa ashi.

National park indang Bahbari Range nung park lapokba atema sentong ka agitsü renema lir.

Arunachal aser Norway research centre tsüngda MoU nung sign step



Itanagar, September 27, 2023 (Agencies): Arunachal Pradesh sorkari Bodbarnü Norwegian Geotechnical Institute (NGI) den memorandum of understanding (MoU) ka nung sign sütepogo.

Arunachal Pradesh nung geothermal potentials maparen inyaktüsü atema MoU nung sign sütep. NGI ya geotechnical engineering aser engineering geosciences nung independent research centre ka lir.

NGI-i Tawang aser West Kameng district tem nung shimteta aliba geothermal sites nung geological, geochemical aser geothermal investigation mapa inyaktüsü.

Iba MoU nung Science and Technology, Arunachal

Pradesh secretary Repo Ronya aser NGI, Norway technical expert Dr Rajinder Bhasin nati sign asü.

Iba mapang Arunachal Pradesh chief minister Pema Khandu, Science and Technology minister Honchun Ngandam, Chief Secretary Dharmendra aser Norwegian Embassy, New Delhi senior advisor Dr Vivek Kumar nungertem liasü.

"Alima tatsükba akümba tebilemsü mapang green aser clean energy production atema iba ya mapa tajung ka lir. World Tourism Day nung MoU nung sign süteptsüsa ajuruogo" ta CM Khandu-i ashi.

Taküm World Tourism Day indang omenji 'Tourism &

Green Investment' lir aser iba mapa tasen den kanga putepa lir, ta paisa ashi.

Iba study ajanga Arunachal Pradesh nung renewable geothermal sources adoktsü aser energy supply talila akümtsü imlar, ta CM Khandu-isa metetdaksü.

Iba mapatong ya Royal Norwegian Embassy-i NGI ajanga yarir.

Centre for Earth Sciences & Himalayan Studies (an autonomous organization of the Department of Science & Technology), Government of Arunachal Pradesh ajanga NGI den geothermal resources maparen inyaktüsü atema mapang tatsüka jembitepa arua liasü.

Nagorno-Karabakh nungi Armenia nunger pezüsü nung kabo jenaogo

Yerevan, Rongjui/ September 27 (Agencies): Nagorno-Karabakh nung Armenia nunger 120,000 aliba nungi asemsü dak tema iba tesem nungi jenaogo. Azerbaijan-i iba tesem maka atsüingba sülen nüburtem jenshidar.

Armenia sorkari Bodhbarnü ashiba agi, Armenia nunger 47,000 shia Nagorno-Karabakh nungi Armenia-i jena aruogo.

Azerbaijan-i September 19 nü iba tesem maka liasü. Iba sülen anogo ka lir separatist ketdangsürtemi ashiba agi, parnok kangshia prangbong hadirtem toktsüdaktsü aser Russia-i teyongtsü ia yangluba ceasefire ka mulunga agizüka liasü.

Nagorno-Karabakh nung aliba Armenia nungertemi ashiba agi, iba rara nung civilian 10 densema nisung 200 shi süogo. Azerbaijan indang Ministry of Defence-i Bodhbarnü sangdong ka ajanga iba military operation nung asüba Azerbaijan nunger sepai 150 dak tema indang tenüngtem sangdonga liasü.

"Iba ajanga operation koda sashia agi aji sayur," ta Al Jazeera indang osangbener Osama Bin Javaid-i Shusha nungi ashi. "Onoki Azerbaijan sorkar tenzüker kar den sensaksemogo aser parnoki ashiba agi, parnoki anguba advance weapon tem aser parnok züngsemtem ya tamamangtsüka liasü, kechiyong parnoki disarmament inyakyim ya 2020 kum nungi tenzüker alitsü ta bilem, koba tai liasü,"

ta osangbenerisa ashi. "Azerbaijan nunger ketdangsürtemi ashiba agi, Armenia nunger serviceman, military personnel mesüra Azerbaijan anema amshitsü aliba prangbong hadirtem Azerbaijan indang litsü nungi agintsü atema iba operation ya agitsü kanga nüngdaka liasü," ta Javaid-i ashi.

Azeri Tir Ilham Aliyev-i, iba tesem nung aliba Armenia nunger temeden aser security wazüka toktsütsü ta tenangzüka agütsüogo, ajisüaka kum aika temulung melemtep, tesempatep aser azütokshia aruba ajanga Nagorno-Karabakh nung alirtemi iba tesem ya yimjung nung Azerbaijan nung shilem ka akümtsü ta tamang makateter. Tawa Armeina-i aoba lenmang nung garitem aika sendaka lir.

Temulung melemi aliba mapang ka nung ano iba tesem yimtiba Stepanakert nung Armenia-i aotsü atema pei gari nung toztü inoktsü asoshi atatepa aliba mapang petrol station ka apoba sülen nüburtem tali tsübuteper.

Hombarnü petrol station apokba lendong nung nisung 68 süogo, ta Nagorno-Karabakh indang human rights ombudsman Gegham Stepanyan-i ashi. Iba den nisung 290 yiruogo aser Mongolbar nikonstsütsü tashi nung nisung 105 samar bushitepa liasü, ta paisa shisem.

Lendong nung yirur alirtem maneni temang anepaludar aser mozüki tajungba bushia anindar,

ta ministry-i ashi. Ajisüaka Azerbaijan-i iba tesem ita 10 shi mokdanga ayuba ajanga medical tsütsü teyari agütsütsü asoshi kanga saka kumogo, kechiyong amtsük nungi tenzüker mozü tashi tenüngdakba osettem agi kanga anünger.

Taoba kum Baku-i Lachin corridor shibanga toktsü. Iba lenmang kija yagi Karabakh aser Armenia na sendakteper.

Armenian arrtsü nung aliba Kornidzor jila semdangba mapang USAID tekolakba Samantha Power-i, Nagorno-Karabakh nungi jenshia aoertem nem teyari agütsütsü atema USD million 11.5 dak tema agütsütsü telemtetba agiba sangdonga liasü.

Nagorno-Karabakh ya Armenia densema alima kintemi Azerbaijan nung shilem ka ta agizüka lir, ajisüaka iba tesem nung alirtem ya timba Armenia nungertem lir, shinoki Soviet Union chirepba sülen iba tesem ya Armenia nung shilem ka kumdaktsütsü meranga arudar.

1990s nung Azerbaijan aser Armenia na nüjiso anguba sülen Nagorno-Karabakh dak sendakba nung linük ana rara ana tashi raraogo. 1994 kum Armenia-i iba tesem ajunga aser iba tesem temeket nung aliba district kar atsünga liasü. Ajisüaka Azerbaijan-i 2020 kum item tesemtem ya timba meyipa agiogo.

Rara anaprongla nung civilian meyirejang aika süogo aser linük anaprongla nungi nübutem aika jenshia liasü.

North Korea-i US nunger sepai Travis King meyipa yoktsü

Pyongyang, Rongjui/ September 27 (Agencies): North Korea-i America nunger sepai shiba taküm kum tetenzüklen Korea arrtsü adena N Korea-i ia liasü pa meyipa yoktsü.

North indang official Korean Central News Agency-i Bodhbarnü sangdong ka ajanga ashiba agi, North Korea nung ketdangsürtemi Travis King dang ken o ashishiba tembangogo.

Parnoki ashiba agi, pai pa North-i ozüing alema aitba nangzüko. US army yongtsü nung meimchir dak mebeshitsü yimya benshiba aser kin dak ajemdaker pa mezüngmeshia

amshiba ajanga pa North-i jena ao ta ashi.

Ken o bushisüngdangba sülen DPRK kübok ken o dak sendaka aliba ketdangsürtemi linük temzüng ozüing dak ajemdaker U.S. Army sepai Travis King mintoktsü asoshi telemtetba agiogo, shiba ozüing alema DPRK-i aita liasü, ta KCNA sangdong ka ajanga metetdaktsü.

Ketdangsürtemi pa kodang meyipa tyoktsü iba indang osang tejangja magütsü.

July ita Korea linük ana arrtsü nung aliba yimsüing ka semdangba mapang King ya North-i ia liasü. Pa ya tangar dak azükba atema South Korea

nung tepuokdak ka nung ita anashi puoker liasü.

King ya July 10 nü chiok aser Fort Bliss, Texas nung par kidangi meyipa yok, kong pa ano military discipline talila ajangshitsü aser mapa nungi anentsütsü imla liasü.

Pa customs tashi anir oa toktsü saka tayimtsüing mapuso tsüingda jena ao. Pa Panmunjom yimtsüing nung tour nung maden tsüingda kong liasü, iba indang mejangja.

Korea linük ana arrtsü ya kanga junga sübanga lir, saka Joint Security Area nungbo concrete divider ana dang lir aser anatsülen sepaitem lika ajanga aotsü temela.

TENÜNGSANG AGÜTSÜR

Mopungchuket Senso Telongjem (MSTK) aser Ao Temulungtsür Telongjem (ATTK) Kohima ajanga Senso tajungtemi competitive exam ajanga mapa tajung ajangzükba aser pie azüingba wadang nung jenjang tamaba ngutetba asoshi tenüngsang tetushi agütsür.

- Shri. Angtsungba Ozukum** for his success in the recently declared NPSC exam 2022 and securing the post of **Junior Divisional Accountant Under Treasuries & Accounts Department**.
- Shri. Sensopong Aier Secretariat Assistant under Personnel & Administrative Reforms Department.**
- Dr. Aanettsungla** on being conferred Doctorate for her thesis title "**Magnetic Susceptibility, Petrology and Geochemistry of Granitoids in parts of Karbi Anglong Hills, Assam**" from the Department of Geology, Nagaland University, Kohima Campus, Meriema.
- Dr. Aienla Ozukum** on being conferred Doctorate for her thesis title "**Depositional environment and Tectonic provenance of Palaeogene sediments in and around Botsa, Kohima Distric, Nagaland**" from the Department of Geology, Nagaland University, Kohima Campus, Meriema

Iba takok tulu ya tarutsu lanurtem asoshi tatishitsü tajung, aser nenok tenzüka wadang nung Naga nunger asoshi temoatsü südakjangma. Tsüngremi nenok taküm ano maneni moajang ta sarasademtsür.

Sd/-
President, MSTK

Sd/-
President, ATTK

OFFICE OF THE Kosasanger Pusu Menden

Ungma Imlang

B.P.O. Ungma P.O. Mokokchung - 798601, Nagaland

Date : 27/09/23

SANGDONGER

Copy to,

Kohima / Dimapur / Mokokchung / Tuensang

Jenangsanger Senso Tajungtem

Jenangsanger senso tajungtem 30th September 2023, 9:30 AM anogo nung Imlang Aonglenden nung Jenangsanger senso ajak dangi Yimden nüngdak rongdak emergency meeting ali nungji, kibong akar ajak arua atentsü osang yoker. Shiba maruli taking tulu alitsü.

Sd/-

- S. Temsu Lkr, Tatar
- Onentiba JR, Tatar
- L. Imli Imsong, Tatar

Imran Khan tanga tepuokdaki anirogo

Islamabad, Rongjui/ September 27 (Agencies): State indang meim o ken o ka dak sendakba nung okadak kati taoba Pakistan Ato Kilonser Imran Khan ano hopta ana judicial custody nung ayutsü obendanga agütsüba sülen pa linük yimtiba Islamabad anasa tanga tepuokdak kati anirogo.

Arishi kum 70 Khan ya Attock Jail nung hopta asem tashi ayuba sülen Mongolbar aonung Rawalpindi yimti nung Adiala Jail-i anirogo.

Social media nung video balala ajanga, police convoy tulu kati pa Rawalpindi-i anir aoba mapang Khan pusemertem lenmang nung adenshia naro proklotsüba nguogo.

Islamabad High Court-i August ita pa aija aliba agintsüogo, ajisüaka Khan maneni sota lir, kechiyong ketdangsürtemi "cipher" ta nüngja agütsür secret diplomatic cable ka tema adokba bushisüngdangar. Iba ken o ajanga pa PM mapa nungi aginba nung United States densema lir ta kuli agütsü ta pai shia arudar.

Iba taitsüba ya US aser Pakistan nunger ketdangsürtemi magizki arudar. Khan nem tepuokdak

temzüng ozüing kübok Attock nung tagütsütsü tim facility tem magütsür ta shia pa okatsüri Islamabad High Court dang pa tanga tepuokdak tanga kati anir aotsü asoshi mepeshia liasü.

Khan-i aniba Pakistan Tehreek-e-Insaf (PTI) party züngsemtemi ashiba agi, Attock Jail nung pa taküm lendongbang nung lir.

Mongolbarnü okadak ajanga tepuokdak ketdangsürtem dang pa Adiala-i anir aotsü tetuyuba agütsü aser taoba Ato Kilonser ama pa nem facility tajungba agütsütsü ozüing agüja liasü.

"Pai, Attock jail nung pa kechi jenjang nung ayu iba indang kodanga mashishi aser pa Pakistan nung asoshi chichiba nüjiso agütsütsü atema dang rangloker lir ta ashi," ta Khan okatsü Intazar Hussain Panjutha-i Al Jazeera dang Bodhbarnü ashi.

Taoba kum April ita PM mapa nungi aginba sülen Khan-i election jelia agitsü asoshi khanga arudar, ajisüaka sorkai pa takangba magizüki arudar.

August ita tepuokdaki yokba sülen pa election nung metokteptetsü ta election commission-i sangdongogo, shirnoki election January ita agitsü ta metetdaktsüogo.



Maui nung morok mi tesashi adokba sülen Lahaina, Hawaii kübok Malo yimtung nung süngtung aser garitem rongtoker aliba noksa nung angur. Iba morok mi lendong nung nisung 97 asü aser ki 2000 dak tema raksa liasü.

NSF Trophy: Liangmai aser Viswemi FC nati takok angu



Kohima, Rongjui/September 27 (TYO): Bodhbarnü 23buba NSF Martyrs' Memorial Trophy nung Liangmai Football Club aser Viswemi Football Club nati pei tata asaya koka tasembuba round-i iogo.

Iba asayamung ya Angami Students' Union (ASU)-i ayongzüka Indira Gandhi Stadium Kohima nung tang tasayadak lir.

Bodhbarnü mezüngbuba asaya nung Liangmai FC-i goal 2-0 agi KSC Chozuba madak takok ngua liasü.

Asaya nung Liangmai FC atema goal anaprongla ya

Ningtingbo-i (11) minute 26 aser 50buba nung idakja liasü. Maneni pa nemsan man of the match naroküm agüja liasü.

Bodhbarnü tanabuba asaya nung Viswemi FC-i tesülen nungi meyipa atur goal 5-1 agi 12 Tribes United FC ayong ayonga kokogo.

Asaya nung 12 Tribe United FC nungi asayar Pangkhah-i (9) minute asembuba nung mezüngbuba goal idaktsü, ajisüaka mapang tatsüka dang lir Viswemi FC nungi asayar

Kevithuto-i (7) minute 11buba nung goal ka idakja goal kasasa aküm aser asaya mezüngbuba

shilem goal 1-1 nung tembanga liasü.

Ajisüaka asaya tanabuba shilem nung Viswemi team-i asendenshir kanga junga asaya-a parnoki goal pezü idaktsü. Asaya nung Kelengo-i (21) par team asoshi minute 53 aser 57buba nung goal ana idaktsü aser Tejongol (6) aser Rukuvisal (9) natia minute 62 aser 72buba nung goal kaka idakja liasü.

September 28 nü asaya:

1. Nagaland Two-Wheeler Taxi Association @ 11:30 AM
2. New Market FC vs Mima FC @ 1:30PM.

Asian Games nung tetsür shooter temi takok tajung nguogo



Hangzhou, China nung 19buba Asian Games, nung tetsür 25m pistol rapid team event nung gold medal anguba India team nung (R-L) Esha Singh, Rhythm Sangwan aser Manu Bhaker nung medal agizükba sülen tangokba noksa nung angur.

Rongjui/September 27, 2023 (Agencies): Hangzhou, China nung tanga asaya aliba Asian Games nung Bodhbarnü India shooter tem rongnungi Sift Kaur Samra-i 50m rifle 3-position event nung gold medal nguogo.

Samra-i point 469.6 ngua gold medal anguba dang masü saka World aser Games record tasen yanglua liasü. Kasa asaya nung külem India tsür Ashi Chouksey-ia kanga junga asaya bronze medal ngua liasü. Lai point 451.9 angu.

Iba asaya nung China tsür Qiongyue Zhang-i point 462.3 ngua silver medal ngua liasü.

Final masaya tsünga Sift Kaur Samra-i qualification round nung point 594 ngua Asian Games record tasen ka

yanglu.

Tetsür 50m rifle 3-position team event nung India tsür Samra, Chouksey, aser Manini Kaushik nungeri silver medal nguogo. Parnoki qualification round nung point 1764 ngua liasü.

Kasa asayamung tetsür 25m pistol event nung India tsür Esha Singh-i silver medal ka nguogo. Iba asaya nung India tsürsa Manu Bhaker, shiba Youth Olympics champion lir lai medal monguteti liasü.

Asaya nung arishi küm 18 tain Esha-i kanga junga asaya point 34 angu aser silver medal ngua liasü. Iba asaya nung China tsür Rui Liu-i point 38 ngua gold medal anguba den games record tasen ka yanglua liasü. Maneni Jiin Yang-i point

29 ngua bronze medal nguogo.

Gold medal atema final asaya nung nung Esha-i junga masayatet aser lai la indang shot pongu nungi asem mekashi-i liasü. Kasa mapang nung China tsür la yagi target nung khen dang mekashi.

Maneni tetsür 25m pistol team event nung Manu Bhaker, Esha Singh, aser Rhythm Sangwan nungeri gold medal ka nguogo. Parnok asem senteper point 1759 ngua liasü.

Iba asaya nung Manu Bhaker-i kanga junga asayaogo aser qualification round nung lai ajak dang nungi point timtiba ngua liasü.

Iba asaya nung China team-i point 1756 ngua silver aser South Korea team-i point 1742 ngua bronze medal ngua liasü.

International Tennis Hall of Fame atema Leander Paes nominate süogo

Rongjui/September 27, 2023 (Agencies): Grand Slam aiben koker aliba India nung asayar Leander Paes, Mongolbarnü Asia nung tebur tennis asayatem rongnungi mezüngbuba player category nung International Tennis Hall of Fame atema nominate süogo.

Arishi küm 50 tain Paes, ya Class of 2024 atema nominate asür trok rongnung ka lir. Pa Player Category nung Cara Black, Ana Ivanovic, Carlos Moya, Daniel Nestor aser Flavia Pennetta nung den tokteptsü.

China tsür Li Na, shiba Australian Open aser French Open nung kija asaya koka liasü, la ya Asia nung asayatem rongnungi ITHF atema nominate asüba mezüngbuba asayar liasü. La 2019 küm nominate süa liasü.

"Player Category nung International Tennis Hall of Fame atema Asia nung tebur asayatem rongnungi mezüngbuba nominate asüba ya kanga dang tetushi ulura," ta Paes-i ashi.

"Iba asaya küm semer dak tema asaya aser India nunger billion 1.3 dak tema atema Olympics aser Davis Cup nung asayaba sülen ni meranga inyakba reprangtetba atema ni kanga pelar.

"Ni kü tsürapur, adianu, coach, Davis Cup captain tem aser kü indang career nung shilem agir ajak dang kanga pelar," ta paisa shisem.

Tebur Asian Cup nung Yoshimi mezüngbuba tetsür referee asütsü

Rongjui/September 27, 2023 (Agencies): Japan tsür referee Yoshimi Yamashita, taruba küm Qatar nung asayatsü aliba tebur Asian Cup nung mezüngbuba referee mapa inyaktsü.

Yoshimi Yamashita, shiba 2022 küm Qatar nung tebur asaya nung referee asütsü shima liasü, la January aser February ita asayatsü aliba iba asayamung atema shimba tetsür referee pongu rongnung ka lir.

Asian Football Confederation (AFC)-i iba osang sangdongba mapang ashiba agi, "tang mezüngbuba tetsür ketdangsürtemi Asia nung tebur national team asayamung tongtibangtiba nung shilem agitsü renema lir."

Maneni asayamung tali tajungba asayatsü atema Video Assistant Referee (VAR) system-a benoka inyaksangshitsü aser iba ajanga toktepteba nung ketdangsüba

Paes dak aliba India nung asayar Vijay Amritraj-a contributor category atema nominate süogo.

"Ballot nung ano Contributor Category nung Vijay Amritraj aser nungtugu osangbener Richard Evans na densema lir," ta ITHF-i parnok indang website nung ashi.

Paes-i asaya aliba mapang tarep aser tarep temeyoktep asaya nung Grand Slam 18 kokogo aser pa ya taoba mapang tarep asaya nung world No. 1 asayar liasü.

Küm semer shi asayaba mapang pai tarep asaya nung Grand Slam ti aser tarep temeyoktep asaya nung Grand Slam 10 koka liasü.

"Ni nominate asüba ajanga alima ajunga nung tennis asayatsü asoshi tejangraba aliba tanurtem ajungmesotsü imlar. Meranga inyakang aser nüsasa dang tamang katetang, na takoker ka kümtettsü," ta Paes-i ashi.

ATP doubles top 10 nung Paes hopta 462 liasü kong No. 1 asayar ama hopta 37 tashi aliba densema lir aser iba den pai tour nung tarep asayamung 55 kokogo.

Paes ya Davis Cup nung India team nungi küm 30 tashi asayaogo aser tarep asaya 43 tashi akokba record pai bena lir. 1996 küm pa ya Olympics nung tennis asaya nung India nung asayatem rongnungi mezüngbuba medal anguba asayar aküm. Pai Atlanta Games nung bronze medal ngua liasü.

aser telemtetba agiba jenjang tajungba kümdaktsütsü.

Taruba Asia Cup nung tang mezüngbuba team 24-i shilem agitsü. Iba asayamung ya tesüsabuba Qatar-i koka lir aser taruba küm parnoki ayongzüka asayatsü.

Iba asayamung ya kanga toktepa asayatsü imlar, kechiyong taoba küm Qatar nung World Cup asayaba mapang Japan aser South Korea nati round of 16 tonga asayaogo aser taruba küm iba asayamung akoktsü imlar tem rongnung linük ana ya-a densema lir.

Iba den bendenloksema AFC-isa tawa Asian women's Champions League amenokba sangdongogo aser taruba küm nungi asaya tenzüksü.

Asia nung tetsür football asaya ajungkettsü aser sabang tuluba ka nung tetsür asayatem parnok sempet sayatsü atema maongka tali agütsütsü atema iba jenjang ya agiogo.

BILEMDANGANG

"Sobaliba samara pei maitüsü samatsü."